



ATASSUT

UPA14/124-1

Gerhardt Petersen

18.03.2014

Uunga siunnersuut: Tuniniaanissamik nittarsaassisarneq aamma nalunaaqutsersuisarneq pillugu Inatsisartut inatsisaat nr. xx, xx 2014-imeersoq (tuniniaanissamik nittarsaassisarnermut inatsit)

(Inuussutissarsiornermut Aatsitassanullu Naalakkersuisoq)

Tuniniaanissamik nittarsaassisarneq aamma nalunaaqutsersuisarneq pillugu Inatsisartut inatsisissaattut siunnersuut ATASSUT-mit makkuninnga oqaaseqarfigissavarput:

Atuisartunut pisisartunullu siunnersuisartoqatigiit, tuniniaasarneq, nalunaaqutsersuisarneq, akit aamma atuisartunut pisisartunullu maalaaruteqartarfittut ataatsimiititaliat pillugit Inatsisartut inatsisaat, piffissap ingerlanerani pisariaqarfiaatigut nutarterneqartarsimasooq tunngaviusumik ullutsinnut naleqquttumik inatsimmik nutaamik taarserneqarnissaa matumani siunnersuutigineqarmat ATASSUT-mit pissusissamisoorsoraarput.

Inatsimmi atorunnaartussanngortumi aalajangersakkat ingerlatiinnassallugit piukkunnaateqartut inatsimmi nutaami ilaatinneqarnissaat isumannaarniarneqarsimammat ATASSUT-mit iluarisimaarparput.

Taamatulli oqareerluta ATASSUT-mit maluginiarparput pingaartumik sulisitsisut peqatigiiffiata tungaanit inatsisissatut siunnersuutip immikkuualuttortai annikigisassaannngitsumik uparuartorneqarsimasut, ilaatigut allaat inuussutissarsiummik ingerlataqartut ilaasa matuinnartariaqalernissaannik aarlerisaarisoqarsimalluni.

Taamatuttaaq maluginiarparput Atuisartut Siunnersuisooqatigiiffiata tungaanit kissaatigineqarsimasooq Atuisartut Siunnersuisooqatigiiffiat ullumikkutut ilutsini atorlugu ingerlaannassasoq.



ATASSUT-mit soorunami kissaatigaarput inatsisitigut tunngavigineqartut allanngortinneqassappata tamanna tamatigut peqqissaartumik aammalu sapinngisamik kalluarneqartunit tamanit akuersarneqarsinnaasumik tamanna pisassasoq, taamaammallu matumani eqqumaffigilluinnarpavut inuussutissarsiornermik ingerlataqartut aammalu Atuisartut Siunnersuisooqatigiiffiata tungaanit eqqumaffigeqquneqartut.

ATASSUT-millu iluarisimaakkatsinnik maluginiarparput tusarniaanermi qisuariaatit annertuutigut naaperiarneqarsimasut aammalu inatsisissatut siunnersuutip suliarineqarneranut atatillugu pisariaqarfiatigut nalimmassaasoqarsimasoq, aamma qularutigineqassanngilaq inatsisissatut siunnersuutip naammassineqareerluni atuutilernerata kingorna sunniutai ATASSUT-mit eqqumaffigilluinnassagatsigit, qulakkeerusoqigatsigumi nunatsinni niuerneramik ingerlataqartut atuisartullu tamarmik inooqataaffigisinnaasaannik inatsisitigut atugassaqtitsinissaq.

ATASSUT-mit neriuutigaarput Atuisartunut Pisisartunullu Siunnersuisartoqatigiinnut taarsiullugu Atuisartoqarnermut Unammilleqatigiinnermullu Aqutsisoqarfik pilersinneqarpat Siunnersuisartoqatigiit misilittagaat aammalu ukiut ingerlanerini suleriaaserisaat pitsaasut Aqutsisoqarfimmik pilersitsisoqaraluarpalluunniit ingerlatiinnarneqarnissaat aamma eqqanaarniarneqassasoq.

Tassunga tunngatillugu ATASSUT-mit Naalakkersuisut qinnuigissavagut erseqqissaatigeqqullugu Siunnersuisartoqatigiit allaffissornikkut ingerlatsiviani sulisut Aqutsisoqarfinngortussami sulilernissaat eqqarsaataanersoq, ullumikkullu ingerlatsisoqarneranut sanilliullugu Aqutsisoqarfiup allaanerussutigisassaa erseqqissaateqarfigineqassasoq ilanngullugu kissaatigaarput.

ATASSUT-mit iluarisimaarparput meeqqat inuusuttullu piseqqusaarusiortarnermi illersugaanissaat eqqanaarniarneqarmat.

Taamaattorli piseqqusaarutit aammalu tunisinermut atatillugu ilitsersuutit qularnaveeqquteqarpallu qularnaveeqqutit il.il. kalaallisut oqaatsivut niuerneramik ingerlataqartunit tamanit tamatigut



atorneqarnissaat inatsisissatut siunnersuummi ilanngunniarneqartoq imaaliinnarluta ATASSUT-mit akuersaarsinnaanngilarput.

Innersuussutigissavarput Sulisitsisut Peqatigiiffiata mianersoqqussutaat, isumaqarluinnarpugut tamanna pimoorullugu tiguneqartariaqartoq. ATASSUT-mit isumaqarpugut kaammattuutit pinngitsaaliinermiit matumani tamanut iluaqutaanerussasut, taamaammat inatsisissatut siunnersuutip aappassaaneerneqarnissaanut piumasaqaatigissavarput oqaatsinik piumasaqaat peerneqassasoq, taamaassinnaanngippallu pisortat suliffeqarfiinut inatsisissatut piumaffiginninneq saatinneqassasoq namminersortunuunngitsoq.

Allannguisoqarnissaa annertummat ATASSUT-mit kissaatigaarput siunnersuutip aappassaaneerneqannginnerani kingunissaasinnaasut sukumiisumik misissorneqassasut pisariaqassappallu inatsisissatut siunnersuutip suliarineqarnerata piffissaliussamut sanilliullugu sivitsorneqarsinnaanera ATASSUT-mit ammaffigaarput.

Taamatut oqaaseqaateqarluta ATASSUT-mit inassutigissavarput siunnersuut aappassaaneerneqartinnagu Inatsisartut Inuussutissarsiornermut Ataatsimiititaliaanut suliassanngortinneqassasoq.